


Kerbredd 2018



Intro

Heeere - wos bin ich geschafft,
aa mer hatte en Umzug, ich fraan mich, wer hätt´des gedacht.

Noch dem ganze Hick-Hack weije dem Brauchtumsgutachte,
dutt mer sou en Umzug doch glei gonz oannerst betrachte.

Des hätt vehl friejer schon soi misse, weil Gesetz is Gesetz,
jetz brauche mer halt Begleiter, un die ganze Ferz.

Ich will nit maule un aa nit schenne,
mer sollt do oafach en Strich drunner brenge.

Jetzt grieiß ich eich all, vun nah un vun fern,
die Oma un aa de Opa, in ehre foine Zwern.

Alle Zugeraaste, un Verwoandte,
Zimmner Leit un blouß Bekoannte.

Un an die Dibboijer e extra „hallo“,
ehr Leit...die Zimmner Kerb is do!!

Lied: Kerbmarsch

Vorstellung Dreigestirn

Die Stimmung is do, un mer sinns auch,
jetz stelle mer uns ver, sou will es der Brauch:

Kerbmädsche vorgestellt von Christo

Zoe Groß, des is nit nur ehrn Nome,
noa – aa als Gräiserer hoal ich moi Kerbmädsche in de Oarme.

Des macht uns äwwer nix, mer basse zamme,
schun in de Schul häwwe mer newenoanner gestanne.

Ehr Eltern haaße Heike un Michael, sinn zum Glick noch Zimmern
kumme,
un häwwe noch 25 Joahrn als „Oigeplackte“ ehr Hoimoat gefunne.

De Oa orrer Oaner werd sich Denke: „Die häbb ich doch schun emol
gesäihe“,
ja! Beim Belmodi draus dutt se eich Klamodde oudräihe.

Mundschenk vorgestellt von Luca

De Christo Göbel, en schäine junge Moann,
hot in Kloa-Zimmern de Sitz vun soim Stoamm.

Doch soi zu Haus nennt er „die Botschaft vun Groß-Zimmern“,
weil sich in soiner Familie ewe all um unser Örtche kimmern.

Soi Modder Bettina, schafft uff de Gemoa,
ich stell ehn eich vor: vum Äbbelboam de Kloa!

Kerbvadder vorgestellt von Zoe

Soi Modder haaßt Heidi, un des is ehrn Sohn,
Luca Boni, Kerbvadder in blau-weißer Tradition.

Weil Vadder (´88) un Unkel (´91) häwwe getroue die Fabb-Kombi
schun vun Herze,
alle Grie- un Rout-weiße misse des jetz verschmerze.

Un um des gonze noch e wink obzurunne,
do vorn uff´m Eck hot sou moncher frieher bei soiner Oma e nai Jeans
gefunne.

Gebiss

Obacht, veel Betonung!

Aaaach wie guud e Schokoload mit gonze Niss,
äwwer Vorsicht is gebote bei em neie Gebiss!

Aus soim Maul rausgewoielt hots der Moann, un mit Bedacht
zum Obläie extra e Schdanjol Pabiersche uff gemacht.

Ob er die gonze Niss uff soine Felje gemohle hot, schdäiht in de Stern,
e Moinung dodezu lait mer jetz werklich fern.

Wie dem auch sei, die Schokoload is all all, es woar e Wonne,
Pabiersche zamme geknillt un ab in die Tonne.

...Schwätz wie ohne Gebiss...

„Wonn ich jetz noch moi Gebiss hätt, des wär äwwer schäi,
do wern ich emol wouhl flux emol im Mill suche gäih“

Gefunne hot ers, äwwer völlisch demoliert,
denkts eich – im Schokoloadepapier woars, wos woar der Moann
depremiert!

Des woar en daierne Genuss, un deshalb hot die Kapell oans parat
..speelt emol „Ich will koa Schokoload“!

Lied:

Ich will keine Schokolade, ich will lieber einen Mann

Denkmal/Platz

De roure Platz der is jetzt grau,
die Bauarweite woarn e riese Schau.

Es woar en Akt, des will ich eich soue,
bis alles ferdisch woar hot sich sou manches zu getroue.

Es Plaster sou houch, ich will jo nit schenne,
äwwer unne in die Mehrzweckhall kam sou koaner meih enne. (zum Sportlereingang deuten)

De Ouschlußlöchelche is aa nit so bassend platziert,
bei starkem Reije es Wasser die Steckdose passiert.

Un die Terrass beim Meo, die hot jetzt e „leichtes“ (Gänsefüßchen)
Gefälle,
ehr Leit, dout eich liewer blous noch en halwe Deller Supp bestelle.

Woun ich groad iwwer den Platz philosophiern,
loßt uns korz unsern Blick noch do driwwe fokusiern. (nach links deuten)

Es Denkmal is do endlich isses sou weit.
Do driwwer kennt mer e gonz Kerbredd schreiwe, ehr liewe Leit.

Long ersehnt steihts endlich do,
Dank sei der Kerbdenkmalsfindungskommision.

Un weil des Wort echt schwer is, mancher ahnt es vielleicht schon,
Macht unsern Mark daraus einfach die Kerbfindungskommision.

Die Kerb muss sich nit meih finne des waaß sougoar moim Vadder
soin Sohn,
Weil die is un bleibt Zimmerns greiße Tradition.

Beim Baue is dere Firma 3 mol der quadratische Stoa dorchgebroche,
mer kennt groad moane die woarn beim Schaffe besoffe.

Es Rouher wou die Elektrik leit wor verschdoppt mit eijend em Krom,
bis zu de Einweihung wusst koaner wouher des kam.

Apropos Leitung, do kimmt mer in de Sinn:
Bis direkt vor de Eröffnung woar nit oan Troppe Bier in de Gläser vum
Schankwoue drin.

Die Leitung woar zugefrohrn bei minus 10 Grad.
Bei dere Temperatur steiht koa Bier zum Verzehr parat.

Wos e Glick läft aa Bier aus dem Brunne,
sou is doch noch jeder zu soim Schoppe kumme.

Die Kerb hot e Denkmol un do druff Sinn mer stolz,
hoffentlich dutt's koaner beschmiern ich kloppe uff Holz.

Mer häwwe do riwwer (deuten) geguggt, jetz dreht eich emol rim,
de Griene sei "Doank", ich finn es echt schlimm.

Om Wasserspeel vorbei in de Kerbfarwe wie foi, (den Weg zeigen bis zur
Wand)
kennt on dere äbscht Wänn do rächts e wunnerboar Gemälde jetz
soi.

Äwwer noa...per Eiloutroag words kabutt diskutiert,
un es Gemoaparlament hot zu gurer Letzt kapituliert.

Sougoar en Schponsor hots gewwe fer die subber Idee,
äwwer er dorft nit, des dutt doch im Kopp schon weih.

(ironisch) Beton in Beton harmoniern weiter alle Fläche,
ich muss mich, bevor ich ausrast, jetz werklich beherrsche.

Heizung

Bei de Evangele woars bitter kolt, do musst Oaner bei,
in de Dibboijer Stroß is e krass Firma, die brenge des in die Reih.

De Simbl fäihet do he, dutt Stunne long baue,
dodebei dutt ehm de Rauch iwwer die Schultern schau.

Die Zwaa häwwe in dere Zeit schäi e wink geschnäwwelt,
un bei de Evangelische hots als weider gedrebbelt.

Derweil häwwe die schun e poar mol „krass“ telefoniert,
weil bei denne ehrne Heizung is als noch nix bassiert.

De Katholische ehr Heizung dutt eisentlich gor nit kronke,
äwwer fer die Awweit dutt mer sich mit em Fläschje Oijelwoi
bedonke.

Der Simbel woar in die falsch Kersch ausgerickt,
dodriwwer worn die Evangele werklich nit verzickt.

Die Rechnung fer die Katholike hielt sich garantiert im Rahmen..
... AMEN!

Ehr Leit, jertz werd emol es Gesongsbuch in die Hänn genumme,
„Danke“ Vers 1 – 2 sinn mer in de Sinn gekumme.

Lied
Danke

Chorgemeinschaft/Feuerwehr

Letzt Joahr bei Chorus Line – Hinweis on die Presse-
des is nit de AGV, bitte nit meih vergesse!

Generalprobe muss soi, die Feierwehr zu Rächt woar aa mit debei,
alle Feuermelder aus sou git's bei Pyrotechnik aa koa Geschrei.

Die Prowe läft glatt bis gonz korz vorm Schluss,
als im Chorraum druwwe e kloa bissje Qualm gewese soi muss.

Des oane Ding woar noch ou un schläigt Alarm im krellste Ton,
denne ehrm Vorstoand gefriert es Blut in de Oarern schon.

Hektisch sucht die Feierwehr ehrn Piepser on jeder Stelle,
um hordisch de Löschezug aus Dibborsch obzubestelle.

De Jack mit dem Sender hängt eijendwou in de Hall,
die Zimmner Trupp woar schun do, steiht in de Jahnstroß uff jeden
Fall.

Dumm gelaafe det ich soue, des ging in die Hos,
äwwer liewer läft's sou, wie es bassiert e Katastroph.

Doachs druff, wär die Show trotzdem boal ausgefalle,
weil eijend en Simbel die Feierwehruzufahrt versperrt,
hot der'se noch alle?

Denkt mer all drou, un des is jetz koan Scherz,
do vorne muss frei soi, is besser fer unser aller Herz!!!

E Lied singe mer koans, des muss jetz nit soi,
äwwer die Brandmelder in de Hall, die sinn in de Reih.

Malle Ausflug

Ehr Leit, noch e kloa Story fällt me groad oi.
En schäine Korzausflug is monchmoal rächt foi.

En rischtisch Korze häwwe letzt e poar Handballer unnernomme,
un sin fer oa oanzischst Noacht noch Malle gefloue.

Doch aa oa Noacht hots monchmol inn sich,
des kann ich eich soue, besunnerst wonn mer is nit groad pinktlich.

Moijends in de Friehe gings donn los,
doch Oaner woar Owends voll, un verschläft die gonz Schoos´.

Also gäihts ohne denn ab zum Flughafe,
en Oannern is ohne Pass, des dudd ja gut laafe.

Doch die Zeit drängt also all enne in die Maschien,
mit de Hoffnung der Kerl därf wirrer mit hoamwärts ziehn.

Der wou dehoam in de Saasch lait, wacht gonz longsom uff:
„Ouh Jesses, moin Flieger is fort“, merkt der in soim Suff.

Die Ouschlussreise werd online gonz schnell gebucht,
die Koste doun sich jetz äwwer uffs sechsfache belaafe – verflucht.

Er rast noch Fronkfurt, doch ehr werds mer nit glaawe,
aa de zwatt Flieger dudd oufach ohne den Buh auslaafe.

Uff Malle solls schäi soi säigt mer doch als,
brennt ehm nix – der hockt dehaom mit sou em Hals! (Pantomimischer
Einsatz geboten)

In Malle-Stimmung kenne mer ehn wenigstens korz bringe,
desdodeweije doun mer jetz unser Kerblied singe.

Lied: Kerblied

Ebbe und Flut

En Blaue vun vor wenigische Joahrn,
is letzt mit soim Vehikle uff e Reise gefoahrn.

E schäi Tour hot der hinner sich gebroacht,
bis noch England hot er riwwer gemoacht.

Noch sou ere lange miehsoame Strecke,
stellt er fest: „Do gits äwwer oig schäine Flecke“.

Der hockt sich also fer e gemitliche Rast,
mitte in de Pampa, uff en Felse, weils sou schäi basst.

Versunne hockt er do un kriecht vun drimmerim nix meih mit,
nit emol, dass es Meer sou gonz longsom näher rickt.

Vun soine Gedonke woar er onscheunend ziemlich gefesselt,
weil plötzlich hot ehn es Meer komplett oigekesselt.

Jetzt woars zu spät, die Flut woar wirrer do,
mim Road wirrer zerick des woar koa Option.

Mit em Hubschrauber word de Kerl vun soim Felse gesammelt,
e gonz leis „thank you“ hot er blous noch gestammelt.

Un die Moral vun der Geschicht:
denkt on die Gezeite!“...orrer halt nicht.

Schlusswort

Apropos Moral...!

Moralisch gesäihe bin ich jetzt om Schluss,
ich hoff es woar aa fer eich en Genuss.

Des woar doch alles nit sou schlimm, im Grund genumme,
im Grouße un Gonze seid ehr all glimpflich devo gekumme.

Stoambers, nemmt die Instrumente jetzt on de Schnawwel,
un ich häiern jetzt a glei uff mit moim Gebabbel.

Weil mer kumme jetzt zum Enn,
ehr wisst ja, uff die Brust gehäiert die Hänn.

Es Liedsche kimmt jetzt in alter Tradition,
unser Hyme noch – un des woars donn schun.

Lied:

Zimmner National Hymne